

63. Ministrabat iis LAKSHMIS, gerens *Kaustubham* gemmam, ipsi concretam, in medio pectore pendentem, manibusque tenens lotorum flabellum.

64. Adstabantque iis septem vates divini, in *Ganga* cœlesti abluti, summi numinis nomen mussantes.

65. Rex, cum talia somnia ab iis audisset, lætus se ipsum gravitate præstantiorem habebat ipso mundi parente.

66. Habitabat in illarum uteris deus unicus, multifariam divisus, veluti luna in aqua limpida.

67. Tum vero, partus tempore, princeps regis uxor pudica filium enixa est, tenebras dispellentem, sicut herba noctu splendoris particeps fit.

68. Pulchro ejus corpore motus, pater dedit ei RÁMÆ nomen, mundo eximiam felicitatem portendens.

69. Ab eo, RAGHUIDARUM familiam illustrante, eximio splendore prædito, lucernæ in gynæceo quasi repellebantur.

70. Mater, extenuato corpore, cum RÁMA in conclavi apparebat veluti *Ganga*, autumnio languida, cum lotorum, in syrtibus remanentium, munere.

71. A KAIKEYI filius natus est, BHARATAS appellatus, bonæ indolis, qui matrem suam ornabat, ut modestia prosperitatem.

72. SUMITRA geminos filios peperit, LAKSHMANAM et SATRUGHNAM, sicut scientia, bene culta, prudentiam et modestiam.

73. Evanescebant universi mundi vitia, apparebant ejusdem virtutes: nam cœlum sequebatur quasi deum supremum, qui in terram descenderat.

74. Hocce quadriformi nato, omnes regiones, quarum reges RÁVANAM timebant, respirabant quasi per ventos, pulvere liberos.

75. Ignis, nullo fumo obscuratus, et sol, puro suo fulgore, antea a *Rákshaso* illo vexati, nunc quasi dolore liberati erant.

76. Hoc momento *Rákshasorum* Felicitas lacrymas quasi effudit, sub specie gemmarum, e RÁVANÆ crista in terram decidentium.

77. Instrumentorum, a rege, filios adepto, post filiorum ortum pulsandorum, initium faciebant deorum tympana in cœlo.